

Al Mittelfest 2020 , la gnove produzion ARLeF

## Giorgio Mainerio, un misteri furlan

La lenghe furlane e sarà valorizade ancje chest an intal contest internazionâl dal Mittelfest.

Dopo dal sucès di "Maraveis in sfrese", il spettacul presentât inte edizion passade, chest an e je la volte di "GIORGIO MAINERIO, un misteri furlan". La opare teatrâl e musicâl contemporanie, fate di peraulis, suns, cuarps e imagjins, e segne la gnove tape de colaborazion fra la ARLeF e il festival.

E sarà presentade in anteprime assolute domenie ai 13 di Setembar dal 2020, sierant cussì chê che e cjape forme tant che une edizion straordinaria, ancje se posticipade rispjet ae sô posizion usuâl intal calendari estîf.

Il spettacul al conte la storie di Giorgio Mainerio (Parma, 1535 - Aquilee, 1582): musicant, predi e, forsit, necromant.

Mainerio al fo innomenât a nivel european pal so *Primo libro de' balli*, editât a Vignesie intal 1578 di Gardano, là che, fra altris bai di stamp talian plui gjenerâi, a saltin fûr trê topoi coreutics e musicâi: *La puta nera, ballo furlano, L'arboscello, ballo furlano*, e la famose *Schiarazola Marazola*. "La sô figure e je emblematiche de complessitàt



Giorgio Mainerio\_Tonino Cragnolini, 1986

pôc cognossude e visionarie dal '500 furlan, dulà che il cult e il populâr si messedin intun misteri no simpri sondabil, dant ae storie di cheste tiere elements di incjant vèr", al spiege Marco Maria Tosolini, che al è ideadôr, diretôr artistic, autôr de dramaturgje e ancje regist de opare adun cun Paolo Antonio Simioni.

"Di cuasi dis agns o colaborin cul Mittelfest: une esperience di grant insiorament e di sodisfazion par dutis dôs lis realtâts - al marche il President de ARLeF, Eros Cisilino -. "Maraveis in sfrese", dopo dal grant

sucès di public dal an passât, al è stât inserit di pôc intal palinsest di RAI5, il canâl culturâl de emitente radiotelevisive di Stât, par dâ une cerce, ancje midiant de nestre lenghe, des particularitâts dal festival di Cividât. O vin confermât cun plasê la presince de Agenzie dentri dal cartelon dal 2020. Ancjemò une volte, la direzion artistiche di Marco Maria Tosolini nus regalarà un spettacul siôr di sugjestions."

Il spettacul - che al puatarà cun se ancje elements dal contest plurilinguistic e pluriculturâl dal Friûl - al è rindût speciâl ancje dal lengaç artistic atuâl doprât, là che dôs polaritâts musicâls - di une bande la musiche antighe e di chê altre chê eletroacustiche - e cuatri atôrs i daran vite a une sene une vore mobil, insiorade di paisaçs sonôrs electronics trasfigurants e videomappings visionaris, che a pontaran il lôr fûc su la opare di pitôrs tant che, par nomenâ cualchidun, Tonino Cragnolini, che i dedicà a Mainerio un cicli esclusif di oparis.

Il public al sarà part ative de piêce, ma, stant che si trate di un Misteri, no si puedin disvelà daurman dutis lis sorpresis...

## Lavorâ cu la lenghe furlane: inviât il prin cors formatîf

Al à cjatât une vore di interès il cors "Tecnichis di promovion linguistiche e culturâl furlane" organizât de IRES FVG Impresa Sociale e nassût dal confront cu la ARLeF, ideadore e partner dal progjet. Inviadis in Jugn, in modalitât in linie, di Setembar lis lezioms a saran in aule, par un totâl di 240 oris. Il cors - che si inseris inte suaze dal Program Specific 64/2018 dal Por Fse Fvg 2014/2020 - al formarà une figure professionâl in stât di doprâ i struments linguistics, di marketing e di comunicazion par valorizâ, midiant de realizazion di events culturâi, il patrimoni linguistic furlan. Ae fin dal percors al è previodût un tirocini.

"O sin pardabon sodisfats dal interès dismovût di chest percors formatîf, che al è il prin dal so gjenar, - al marche il president de ARLeF, Eros Cisilino -. I corsiscj selezionâts a son 13 arlêfs e arlevis une vore motivâts, cun titui di studi in diviersis disciplinis. Chest al dimostre che e je grande cussience di cemût che il furlan al puedi rapresentâ une ocasion concrete di ocupazion, creativitàt e economie."

Coordenât dal Fonts sociâl european intal ambit de atuazion dal POR, a aderissin al progjet, tant che partners, i sogjets principâi e altris ents pe promovion e pe tutele de lenghe furlane.



Il president de ARLeF, Eros Cisilino e l'Assessôr reg. aes autonomiis locâls, Pierpaolo Roberti ae presentazion dal cors